

# YO O TLA LATLHEGANG KE MANG ?

Go bontsi ba batho bo bo sa rateng go tlotla sepe ka ga kgang e, ka ntlha ya go tshaba gore ba ka tloga ba lemoga nnete ka ga molete wa mollo. Ba boifa gore ba ka tloga ba iphitlala ba kgokologela kwa moleteng ka lebelo. Bontsi bo leka go didimatsa digakolodi tsa bona ka mafoko a a reng: Modimo ke Modimo wa lorato, ka go le jalo, ga O kake wa latlhela ope mo moleteng wa mollo. Ka jalo ba gopola gore taba ya poloko ya bona e baakantswe, mme bophelo ba boikepo ba bona bo tla amogelwa kwa legodimong. A ga lo itse ha basiamolodi ba sekitla ba rua boswa jwa bogosi jwa Modimo? Lo se tsiediwe, ga go le diaka, kgotsa badiredi ba medimo ya diseto, kgotsa bagokafadi, kgotsa ba boaka, kgotsa basodomi, kgotsa magodu, kgotsa batagwi, kgotsa bakgadi, kgotsa bapatiki, ba, ga ba kitla ba rua boswa jwa bogosi jwa Modimo. (1 Bakor. 6:9-10). Mme ga go kitla go tsena sepe se se leswafatsang, le e seng yo o dirang maswee kgotsa yo o akang, ha e se ba ba kwadilweng mo bukeng ya Kwana ya Botshelo. (Tshen. 21:27).

Bangwe ba teng ba ba lekanang go supa gore, ga go molete wa mollo fa gotlhe. Ba bangwe ba tlhama thuto ya maitirelo e e reng: Go na le mollo wa tlhatso, o re tla tsenang mo go ona go tlhatswiwa morago ga foo, re tla tsena mo legodimong. Ke se se gagamatsang go bona se se dirwang ke batho, go tla nnete e Beibele e e re bolellang kaga molete wa mollo! Ba bangwe ba tla nnete eo ka go bua ba re: Ga go na bophelo fa morago ga loso, ha re swa, go fedile, ga go na sepe moseja ole wa lebitla. Lefoko la Modimo le bua le re: Gonne go laoletse batho

go swa gangwe fela, go tle tshekiso morago ga moo. (Baheb. 9:27). Sepuka se sengwe sa batho sedumele gore, batho ba ba swelang mo tumelong ya bokresete, ke bone fela ba ba tla phedisiwang gape, ba eseng bakresete ha ba swa, go fedile ka ga bone. Bontsi gape, kwa le kwa mo lefatsheng, bo dumela gore, ha motho a swa, o tla phela gape, a sa tlhole a le motho mme a le sethunya, gongwe kgomo, gongwe noga, gongwe sebopiwa sengwe sa ditlhodiwa. Maaka a mantsi

thata a batho ba a dumelang e le go phophothela digakolodi tsa bona tse di tshogileng molete wa mollo.

## A MOLETE WA MOLLO O TENG ?

Go na le motho a le mongwe fela, yo re ka mo dumelang mo go sengwe le sengwe, ene yo ke Jesu Morena. O buile thata kaga molete wa mollo. Re tla ntsha dikao di se kae mo Beibeleng, gore re tle re utlwe gore a reng kaga molete wa mollo. Le ha e le mangmang yo o rayang mokaulengwe wa gagwe a re, Selo fela, o tla bediwa ka tsheko e kgolo. (Math. 5:22). Ke gona ha leitlho la gago le le siameng le go tshwenya, o le gonye, gonne go molemo go wena gore tokollo ngwe ya gago e fele, gore

mmele wa gago o se digelwe mo moleteng wa mollo. Mme ha seatla sa gago se se siameng se go kgopa, o se kgaole, mme o se latlhe, gonne e le molemo mo go wena gore tokollo ngwe ya gago e fele gore mmele otlhe wa gago o se digelwe mo moleteng wa mollo. (Math. 5:29-30). Mme bana ba bogosi ba tla kgoromelediwa kwa lefifing le le kwa ntle, kwa selo le khuranyo ya meno di tla nnang gona. (Math. 8:12). Mme se boifeng ba ba



bolayang mmele, mme ba sa kake ba bolaya moya, mme bogolo boifang ene yo o nonofileng go bolaya mmele le moya mo moleteng wa mollo. (Math. 10:28). Mme wena Kapernaume yo o godiseditsweng kwa legodimong, o tla folosediswa kwa bobipong, gonne ha ditiro tse di gakgamatsang tse di dirilweng mo go wena, di ka bo di dirilwe mo Sodoma, o ka bo o sa eme le go tsatsing leno. (Math. 11:23). Ke gona jaaka mefero e phuthwa e fisiwa mo mollong, go tla nna fela jalo mo khutlong sa lefatshe leno. Morwa Motho O tla roma baengele ba gagwe, ba tla tlhopa tsotlhe tse di kgopisang, le bona ba ba siamololang mo bogosing jwa gagwe, mme o tla ba digela mo bokepisong jwa mollo, go tla nna sello le phuranyo ya meno. (Math. 13:40-42,49,50). Mme a mo raya: Tsala, o tsenye jang fano, ka o sena seaparo sa nyalo? Mme a tlhoka puo. E dira gona kgosi e rayang batlhanka, mmofeng diatla le dinao, mo tloseng, mme mo latiheleng fifing le le kwa ntle kwa sello le phuranyo ya meno di tla nnang gona. (Math. 22:12-13). Dinoga ke lona, le lesika la Shaushawane ke lona, lo tla tshaba jang tshekiso ya molete wa mollo? (Math. 23:33). Mme ba, ba tla ya petsong e e sa khutleng, mme basiami ba tla ya botshelong jo bo sa khutleng. (Math. 25:46).

### **MOLETE O NTSE JANG ?**

Jesu O kile a tsholetsa sesiro a re senolela molete wa mollo. Mo go Luka 16:19-31 O re supetsa ka fa molete wa mollo o ntseng ka teng. O re supetsa sengwe se se boitshegang se leitho lepe le iseng le se bone. Dikgabo tsa mollo di kupa ka poitshego. Mo gare ga tsona go monna. Monna yo ga a robala, o phaphame, O a phela, o lemoga tsotlhe tse di mo diragalelang, O a bona, o na le maikutlo a otlhe. O utlwa ka tsebe, o utlwellwa ka leleme. Monna yo, o kile a phela, a sepela mo godimo ga lefatshe le jaaka rona. O kile a utlwa dithero tsa bapofiti, jaaka le rona re ntse re di utlwa kajeno. Se se utlwisang botlhoko ke gore o ne a sa kgathale go utlwa se Moshe le Baporofiti ba se mo reralang, fela jaaka kajeno go batho ba ba sa kgathaleng go utlwa se Modimo O se buang, le se bareri ba se buang mo lefokong la Modimo. Monna yo, o ne a sa akanye, le eseng go kgathalela bophelo jo bo fa morago ga loso, ka gongwe o gopotse gore, Modimo ke Modimo O O molemo, ka jalo ga O na O molatlhela mo moleteng wa mollo. Ha O ka tshokile O mo latihetse teng, baruti ba bantsi ba tla mo rapella gore a tswe teng. Tsala ya me, le fa ntse jalo, a thuthumele mo moleteng, ke yoo, re mmona mo gareng ga dikgabo tsa mollo.

Okomela sefathleho sa gagwe o bone matlhomola, leba matlho a gagwe, o bone poifo ya tsholofologo. Utlwa sello sa gagwe masetlapelo, jaaka ha se bitsa: "Abraham rra, nkutlwele botlhoko, o rome Lazarus a ine nthla ya monwana wa gagwe mo metsing, a ntsidifitse loleme, gonne ke a sha mo

kgabong e ... ke a go rapela he rra, a o ko o mo romele kwa tlung ya ga rre, ke na le bana rre ba le batlhano a ba tlhagise gore ba se tle felong fano ga botloko." Abraham rra a mo raya a re: Ba na le Moshe le Baporofiti, a ba utlwe bona; monna yo, a re: Ha mongwe a ka tswa mo baswing a ya kwa go bona, ba tla mo reetsa. Abraham a mo raya a re: Ha ba sa utlwe Moshe le Baporofiti, le ha mongwe a ka tswa mo baswing, ga ba kake ba mo reetsa.

Ditsala tsa rona ke di le kae? Le masika a rona ke a le kae kwa moleteng wa mollo kajeno, ba ba eletsang go boela kwano lefatsheng go tla go re tlhagisa ka ga nnete ya molete wa mollo? Ba gannwa go bowa ka nthla ya gonne re na le Lefoko la Modimo, re tshwanetse go dumela lona, Ke ba sekae fela.

Tlhokofatso ya kwa moleteng wa mollo ga se ya sebakanyana fela, ke ya bosena-bokhutlo. Ntlogeleng barogwi ke lona, lo yeng mo moleteng o o sa khutleng. (Math. 25:41). Mme diabololo yo o ba tsieditseng a digelwa mo letsheng la mollo le sebolele..., mme ba tla utlwiwa botlhoko tsatsi le bosigo ka bosena bokhutlo jolhe. Mme le ha e le mang mang yo O sa fitlhelweng a kwadilwe mo bukeng ya botshelo, o digelwa mo letsheng la mollo. (Tshn. 20:10-15). Kwa seboko sa teng se sa sweng, le mollo wa teng o sa timeng. (Mark 9:48).

Molete ke felo ga tlhokofatso, le pogisego le botlhoko. Beibele e re bolella gore, go tla nna sello le phuranyo ya meno kwa teng. Mollo o a tlhokofatsa. Batho ga ba lele, le eseng go puranya meno ha ba sule jaaka nja, gongwe go sa phelwe fa morago ga leso jaaka bangwe ba bua. Go a phelwa fa morago ga leso. Re buisa mo go Tshen. 20:12 ga twe: Ke bonye baswi, bangwe le bagolo ba eme fa pele ga Modimo. Ha re ka wela mo moleteng, re tla utlwa tlhokofatso ya mollo ka gale le ka bosena bokhutlo.

### **KE MANG YO O YANG MOLETENG WA MOLLO ?**

Molete o baakanyetswe Satane le baengele ba gagwe. Botlhe ba ba leofileng, ba reetsa maaka a ga satane, ba maina a bona a seng teng mo bukeng ya botshelo, le bona ba ya moleteng. Re buisa jalo mo go. (Math. 25:41 le Tshen. 20:15). Go tewa mmogo le wena le nna. Gongwe botlhe ba baleofileng ba tlhailwa ke kgalalelo ya Modimo. (Baroma 3:23). Ke gona jaaka bolelo bo tsile mo lefatsheng ka motho (Adam) a le mongwe fela, yo botlhe ba leofileng mo ene, le leso ka bolelo, mme jalo loso lo a phollela bathong botlhe. (Baroma 5:12). Ka nthla ya bolelo ba ga Adam, leso le tsile mo go rona botlhe, ka go le jalo, wena le nna re tshwanetse go swa. Ka one mokgwa oo, bolelo bo tsile mo wena le nna, ka jalo rotlhe re baleofi fa



pele ga Modimo. Re na le tlhago ya boleo le keletso ya go leofa le ya go gana go reetsa Modimo. Motho ga a rutwe ke ope go leofa, ba leofa fela ka tlhago. Batho ba rutwa go boifa Modimo, le go O ineela, le go O direla. Kantlha ya boleo bo bo wetseng batho botlhe, re tla tlhaelwa ke kgalalelo ya Modimo, ka jalo re ya rotlhe kwa moleteng. A re a rata go itse jalo, a ga re rate, rotlhe re kgokologela mo moleteng o o sa khutleng.

Bontsi bo rapela bo re: Morena, Morena; ba boaboela mafoko a kobamelo mo kerekeng beke le beke, mme ba sa itse Morena jaaka Mopholosi, ebile ba sa tsalwa gape. Le bona ruri ba tla ya moleteng. (Math. 7:21-23). Gape go bangwe ba ba ikanyang e le bakriste ba nnete, mme ba sa ungwe maungo a a tshwanetseng tlhabologo. Le bona ba tla latlhelwa mo moleteng. (Math. 7:19). Ditiro tsa nama tse di sa tshwanelang go bonwa mo go rona ebong kgokafalo, patelo, maswe, boaka, tirelo medimo, le diseto, too, kilo, komano, dikganesto, bogale, kgang dikgagaoganyo, ditomologanyo, dipelotshetlha, dipolao, ditago, le mediro ya tlhapelo, tse ke di lo reileng pele, jaaka nkile ka lo raya ka re, ba ba dirang dilo tse di ntseng jalo, ga ba kitla ba nna le boswa mo bogosing ba Modimo, bontsi bo a di dira. (Bagal. 5:19-21). Mme ha re ipitsa bakresete, gona lefatshe le tshwanetse go bona mo go rona: Lorato, boitumelo, kagiso, pelotelle, bopelonomi, molemo, tumelo, bonolo, le tekanyo. (Bagal. 5:22-24). Ba ba tla fitlhelwang kwa moleteng wa mollo, ke bona ba ba sa tlhatsiwiwang ke madi a botlhokwa a ga Jesu, bona ba ba sa tlhabologang mo dibeng tsa bona, ba ba sa amogelang Neo ya Modimo e e leng botshelo jo bo sa khutleng, ba ka lonyatso la bona, ba gatakileng Madi a Jesu ka dinao tsa bona.

Morena O ne a bua le Nikodimo yo o neng a le moreri, a mo raya a re; Ha motho a sa tsalwe gape, ga kake a bona mmuso wa Modimo. (Joh. 3:3). Ka mafoko a, Morena O ne a mmolella gore, le fa a le moreri, ebile a le monna yo o siameng thata, go santse go tlhokafala gore a tsalwe gape, ke gona a ka tsenang mo legodimong. Ha re sa tsalwe gape, ga go kgathelege gore re phela bophelo bo bo molemo, jang, rure re tla ya moleteng wa mollo. Lo itlhoma o tla tshwanelwa ke petso e kgolo bogolo efe, yo o gateletseng Morwa Modimo ka dinao, yo o kaileng madi a kgolagano ha a sa itshepa, a a itshepitsweng ka ona, yo o diretseng Moya wa tshegofatso lenyatso? Pusoloso ke ya me, Ke tla ba duela; go bua Jehofa. Mme gape Jehofa O tla sekisa batho ba gagwe. Ke se se boitshegang go wela mo diatleng tsa Modimo O O tshedileng. (Baheb. 10:29-31).

#### **YO O RE ROMELANG MOLETENG KE MANG ?**

Bontsi ba batho ba re, ka Modimo O le lerato lo lo kalo, ga O kitla O re romela kwa moleteng.

Jaanong ke eng ha batho ba ya moleteng? Mo loratong lwa Ona, Modimo O dirile tsela ya go falola, mme go tlogetswe gore mongwe le mongwe a ikattholele kwa a ratang go ya go nnela bosakhutleng teng. Modimo O tlogetse wena le nna gore re ikattholele legodimo le molete. Ha re rata go ya legodimong, tsela ya teng re e supeditswe sentle. Ha re tlhokomologa tsela ya Modimo ya go re pholosa re itshekela go e gana, re ithatela go itumela ka boleo sebakanyana, go rialo re ikisa moleteng ka nosi, go itumella boleo, ke yona tsela ya go ya moleteng, wena le nna, re supeditswe tsela e e yang legodimong, le e e yang moleteng, mme ke wena le nna ba re atlholang gore, tsela re tsaya efe, le go tsamaya mo tseleng eo go ya kwa bokhutlong ba yona.

#### **RE TLA FALOLA JANG ?**

Modimo O re diretse tsela ya go falola, e e sa rekweng ka madi, tsela eo ga e batle gore o nne le thuto e e kwa godimo, tsela yeo ga e batle gore o phele bophelo jo bo phepa o ise o e amogele, ebile ga e re o e sebeletse. Tsela ya Modimo ke ya fela, ke ya moleofi yo o bosula thata, le yo o siameng. E ka tlhaloganwa ke ngwana yo o senang thuto epe, fela jaaka mogolo. E ya gakgamatsa, e ya galalela, mme e tsisa kagiso le boitumelo. Tsela a re rola morwalo o o bokete wa sebe mo magetleng a rona, mme joko ya Modimo e bobebe. (Math. 11:29-30).

Tsela ya Modimo ke gore re futsafalele dibe, re be re di tlhanogele. Mme jaanong ke ya itumela ... ka lo futsafaletse tlhabologong .... Gonne khutsafalelo Modimong e dira tlhabologo e e isang polokong. (2 Bakor. 7:9-10). Lereng maungo a a tshwanetseng tlhabologo. (Math. 3:8). Le gona ke lo raya ke re, go tla nna boitumelo jo bogolo mo legodimong mo moleofing a le mongwe yo o tlhabologang, bogolo go ba ba masome a a robang le metso e robong ba ba sa tlhokeng tlhabologo. (Luk. 15:7). Go kwadilwe jalo, mme Kresete O tshwanetse go boga jalo le go swa le go tsoga mo baswing ka letsatsi la boraro, gore tlhabologo le go itshwarela dibe go rerwe mo ineng la gagwe mo chabeng tsotlhe. (Luk. 24:46-47). Molemo wa Modimo o gogela tlhabologong. (Barom. 2:4). Ha ka tlhotlhetsetso ya Moya O O boitshepo re bonye gore re baleofi ba bagolo jalo, re futsafaletse dibe, re tlhabologa, foo le gona, re tshwanetse go ipolela dibe, gonne: O tshiamo ya go re itshwarela dibe, le go re itshepisa mo tshiamollong tsotlhe. (1 Joh. 1:9).

Le gona re tshwanetse go dumela le go amogela ka tumelo se Jesu a se re diretseng. "Mme jaaka Moshe a kile a tlhatlosa noga mo gareng ga naga, Morwa Motho le ene O tla tlhatlosiwa jalo gore mongwe le mongwe yo o dumelang mo go ene a se ke a latlhega, mme a nne le bophelo jo bo sa khutleng. Gonne Modimo O ratile jalo, ka O ne

wa naya Morwa Ona yo o tsetsweng a le osi, gore mongwe le mongwe yo o dumelang mo Ene a se ka a lathega, mme a nne le bophelo jo bo sa khutleng. Gonne Modimo ga O a roma Morwa Ona mo lefatsheng gore a sekise lefatshe, mme gore lefatshe le bolokwe ka Ene. Yo o dumelang mo go Ene, ga sikisiwe, mme yo o sa dumelang o setse a sekisitswe, ka a se ka a dumela mo leineng la Morwa Modimo yo O tsetsweng a le esi. Yo o dumelang mo go Morwa, o na le botshelo jo bo sa khutleng, mme yo o sa dumelang Morwa ga a kitla a bona bophelo, mme bogale ba Modimo bo mo go ene. (Joh. 3:14-18,36). Ammaruri ammaruri ke lo raya ke re ene yo o utlwang, a dumela Ene yo o nthomileng, o na le botshelo jo bo sa khutleng, mme ga a kitla a tla mo tshekisong, mme o kgabagantse leso, o ile botshelong. (Joh. 5:24). Gonne le bolokilwe ka boitumelo ka tumelo, mme ga se tswe mo lona. (Baef. 2:8). Lo a bona he jaanong gore se rona re tshwanetseng go se dira, ke se se nnye fela, ga se re batle matsapa ape! Se se batlegang fela, mo go rona ke tlihabologo, boikwatlhao, tumelo le go amogela Jesu Kresete jaaka Morena le Mopholosi wa rona. Yo O duelang tsotlhe le yo O nayang tsotlhe ke Jesu Morena. O dueletse poloko ya rona ka bophelo ba gagwe mo sefapaanong sa Golgotha. O tlhatswa dipelo tsa rona ka madi a gagwe, O re itshwarela melato ya rona, O re naya tshiamelo ya go nna bana ba Modimo. O a re amogela a re dire ba gagwe tota. Kana ke poloko e e gakgamatsang, e e galalelang jang, e Jesu a e re phumusetang! A o ko o e amogele, o bo o amogele Jesu gona jaanong.

Moikepi mongwe, o kile a tlasela mokresete, mongwe, a leka go mo kgothatsa ka go mo supetsa gore tumelo ya bokresete ga e na mosola, ga kake a kotula sepe ka yona. Moikepi yoo a botsa a re: Ke eng se Jesu a se go diretseng? Mokresete a re: O mpholositse. Moikepi a botsa gape Pholoso

ke eng? Ha a botsa jalo, ga bonala go kera ga motho a sa dumele mo sefatlhegong sa gagwe.

Mokresete yole a re: A re ye le nna kwa mojakong, ke tla go supetsa. Ba tsamaya mmogo, ba ema kwa ntle. Mokresete yole a sela matlhare a a omeletseng, a dire lesakana ka ona. Jaanong a senka seboko, ya re a sena go se bona, a se baya fa gare ga lesakana la matlhare. Jaanong a tsaya mokgwaro a tlhosesa matlhare ale, moikepi a ntse a mmogetse ka kgakgamalo. Ha kgabo ya matlhare e tihatloga, seboko sa simolla go menogana, le go phethogaka, go bonala sentle gore se mo tlaelong ya leso, fela se pallwa ke go tswa mo gare ga lesakana la mollo. Mokresete yole, a tlhaganela, a phamola seboko sele mo gareng ga kgabo le musu, a ya go se baya kgakala le mollo, mo bojannye jo botala.

A o a bona? Go bua Mokresete yole. Ke sona se Jesu a se ntiretseng seo. Ke ne ke le mo tlaelong ya molete. Dikgabo tsa molete di ne di ntikanyeditse go sena phatla ya go falola. Ke ne ke le molefi yo mogolo, ke saletswe ke go senyega mo moleteng, Jesu a nkgolola ka go swela dibe tsa me, a nkgola mo mollong jaaka mmoko mo kgabong.

Ao tsala ya me, kana rure o fologela mo moleteng, a ga o kake wa lela, wa tlihabologa, wa ikwatlhaya, wa mmolella dibe tsa gago, wa mo amogela gore a go pholose? O seka wa okaoka, mo amogele jaanong. Le ha o ka na o le fa kae, tshollela pelo ya gago mo go Jesu, O a go rata. Ga a rate gore o nyelele, O rata go go pholosa. O letile fela go utlwa ha o lelela kwa go Ene. Mmitse jaanong, mme O tla go tlhopollela seatla sa gagwe se se phuntsweng, a go ntsha mo kgabong, a go baya mobotaleng, kgakala le kwatlhao e e sa khutleng ya molete. O tla go baya mo tseleng e e yang legodimong. Mo ikanye jaanong.

*M.R. Gschwend.*

The popular "Heart Book" with its soul-saving message is obtainable in over 500 languages. Many have found salvation even just by looking at the pictures.

Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

For **free** Gospel literature, books and tracts in over 540 languages, write to:

EMAIL: [info@angp.co.za](mailto:info@angp.co.za)

**ALL NATIONS GOSPEL PUBLISHERS**

**P.O. Box 2191, PRETORIA, 0001, R.S.A.**

(A Gospel Literature Mission financed by donations)

(Reg. No. 1961/001798/08)